



Tēnā koe

Te whakahounga o *Te Whāriki* – marautanga kōhungahunga

Tēnei rā te hōnore ki te whakaatu i tēnei whakahounga o te marautanga kōhungahunga, o *Te Whāriki* (2017). Ko *Te Whāriki*, te marautanga kōhungahunga o Aotearoa e arataki nei i te ao, ā, kua neke atu i te 20 tau te mārō o te haere o tēnei marautanga. I whakahoutia ki te whakaata i ngā panonitanga o tēnei ao i roto i ngā ariā me ngā mahinga mātauranga tae atu hokiki ngā wawata mō ngā rā kei te heke mai.

E rua ngā putanga o *Te Whāriki*: *Te Whāriki: He whāriki mātauranga mō ngā mokopuna o Aotearoa Early childhood curriculum* me *Te Whāriki a te Kōhanga Reo*. Ahakoa he ōrite te anga mātāpono me nga whenu o ngā marautanga, e rua tonu ngā ara marautanga. Nā te reoruatanga o *Te Whāriki* i noho ahurei ai.

Hei tā *Te Whāriki*, ko tōna whakakitenga, he whai kia tipu ngā tamariki katoa hei ākongā pakari, ākongā tū māia, he kaha te tuakiri, he kaha te reo, he kaha hoki te ahurea.

Ko te hunga nā rātou i whakahou i te marautanga, ko ngā mātanga mātauranga me ngā kaiako kōhungahunga nō roto mai i ngā momo horopaki kōhungahunga katoa. I noho tonu ngā kaituhi tūturu o *Te Whāriki* me Te Poari Matua o te Kōhanga Reo ki te arataki i te rōpū nei.

Mārama te kitea ngā hononga mai i *Te Whāriki* ki te *New Zealand Curriculum* me *Te Marautanga o Aotearoa* e taea ai te tautoko ake ngā tamariki e whakawhiti nei mai i tētahi taiao ako ki tētahi atu. Mā ngā kaupapa whakahaere, ngā taumata whakahirahira, ngā whāinga matua me ngā whāinga akoranga o *Te Whāriki* e whakarato i te tūāpapa ki te hanga marautanga hei tautoko i ngā tamariki kia tū māia, kia tū pakari, kia hihiko ai te ngākau i a rātou e tīmata nei ki te hīkoi i te ara mātauranga. He marautanga e hāngai ana ki te whatu mauri o te ākoranga roa, hei whanake i ngā pūkenga o ngā tamariki.

Tēnei rā te whakahau ki ngā ratonga kōhungahunga o Aotearoa kia whakamahia tēnei marautanga o *Te Whāriki*. He tautoko i ngā ratonga kōhungahunga kia mahi ngātahi me ngā mātua, ngā whānau me ngā hapori hei whakarato i ngā hononga me ngā wheako e angitu ai ā tātou tamariki.

Ngā mihi

Iona Holsted
Secretary for Education